

## Pordoná i lubidá

---

**Pordoná i lubidá ta chapo. Nos no ta hasi e asunto ei mas nò. Nos tin sistemanan digital ku memorianan digital. I esakinan no ta lubidá. Nan no konosé pordon. Unabes algu ta den cloud, e no ta sali nunca mas. Hinter nos mundu a kambia ku esaki. Awor ku informashon literalmente a haña un balor di eternidat i ku na mes momentu pordoná no ta popular mas, nos mundu ta kristalisá bira un kara itrèk.**

E mundu digital ku no ta lubidá ei a bira un punto di guia pa nos opinion i aktuashon den e mundu real. No ta importante mas ku kada proseso di siñamentu ta bai kompañá pa kaimentu i lantamentu. Ku esaki nos ta lubidá ku sin kai i lanta, kada proseso di desaroyo ta stòp. No muchu tempu pasá ei, sektor empresarial tambe tabata hasi su parti di 'pordoná i lubidá'. Naturalmente esaki tambe tin su desbentahanan evidente. Ta mantené asuntunan sekreto, ta skonde nan i laga nan disparsé bou di tapeit. E mantel di 'amor' ku ta kubri tur kos ta deshasí di tur eror. Tiki accountability, pa uza terminologia di governance.

Hopi aña kaba ta hurisprudensia konsolidá ku atministradó-i komisarionan tin mag di kometé eror. Pió ainda, segun Korte Supremo, bo no por manehá bon si bo no ta riska kometé eror. Ke men pa erornan gewon, atministradónan no ta responsabel. Ta te ora ta trata di un eror grave numa ta papia di un posibel responsabilidad. Den lei, nos konosé término di kadukashon tambe. Despues di un sierto kantidat di aña, no por pèrsiguí un direktor òf komisario òf pidi nan akklarashon mas. Mundu digital no konosé término di kadukashon.

Ku esaki, den mundu komersial tambe nos ta biba den un kultura di pidi kuenta i rason sin miserikòrdia. Nos ta mostra atministradó- i komisarionan riba prinsipionan i 'best practices' den corporate governance. Nos ta indiká ku tur ora bai 'interes di empresa' ta pará na promé lugá. Sinembargo mas i mas, nos ta tradusí interes di empresa na un obligashon pa kumpli ku tur sorto di regla i stipulashon ('compliance'). Esun ku no tene su mes na esakinan, nan ta bula afó. Ku esaki, kai i lanta komo un manera normal ku kosnan ta kana, a disparsé. I e siñamentu tambe pues. I esaki no ta na interes di e empresa. Ke men, komisarionan den nan interakshon ku gerensia, mester duna mas atenshon na diskutí e posibilidatnan di drechamentu ku na kontrolá, chèk i marka. Ademas, nan mester konfia nan un manera saludabel.

Integridat, transparensia i responsabilidad ta e tres pilánan di bon corporate governance. Bon mirá, esaki ta solamente un banda di e medaya. E otro banda di e medaya ta konfia ku ta hasi loke mester hasi. Den esensia, muchu kòntrol i pidimentu di kuenta i rason ta un ekspreshon di falta di konfiansa. Analisá di e manera akí, integridat, transparensia i responsabilidad no por eksistí sin konfiansa. Si e konfiansa no t'ei, e ora ei tin un falta fundamental di ekilibrio.

Den e relashon di mas esensial den bo bida, esun ku bo partner, kosnan ta funshoná na presis e mesun manera. Bo ta ferwagt honestidat i frankesa di bo partner. Si bo partner gañabo òf tumabo hasi, mayoria biaha esaki ta final di e relashon. Sinembargo, esaki tambe tin dos banda. Un falta di konfiansa di bo banda tambe lo por resultá den final di e relashon. Si tur dia na kabamentu di atardi, bo marka na man di un lista di chekeo si bo partner ta konfiabel, e ora ei rápidamente por dobla warda p'e relashon ei.

---

E realisashon akí nos mester trese bèk den corporate governance tambe. Nos ta ferwagt transparensia i integridat di e atministradó. Si e modus operandi di e komisario ta solamente kòntrol i pidimentu di kuenta i rason, e ekilibrio nesenario lo disparsé. Den esaki, nos no mester laga e sistemanan di informashon kue nos kabes abou ku nan monton di asina-yamá echonan ku bon mirá ta kondena: tur sorto di grafik, tabèl i skema. Esakinan ta e lakayonan di e sirbientenan digital. Den hopi kaso nos tin mag di ta chapo sí: pordoná i lubidá.



[Frank Kunneman](#)

VanEps Kunneman VanDoorne  
Attorney at law | Partner

T +5999 461 3400 ext. 254

E [kunneman@vandoorne.com](mailto:kunneman@vandoorne.com)

---